



Daifim

An Official Organ of YMA, Khuangpuilam Branch.

YMA MOTTO



Hunawl hman that
Zofate hmasawwna ngaihtuah
Kristian nundan tha ngaihsan

Khawchin : Source - Accuweather.com



Khua a that rin a ni.
Temp - Max: 28°C Min: 17°C
Dar 5:35-ah ni a chhuak ang a,
Tlai Dar 4:33-ah a tla leh ang.

Vol - VI Issue No. - 43

- Sahmulphah Thla -

15th November, 2020 (Pathianni)

*Tunkar chang vawn : Mat. 18:20
"Mi pahnih emaw, pathum emaw ka
hminga an thut khawm apiangin an
zingah ka awm si thîn a," a ti a."*

Bawrsap thuchhuah

Assam-Mizoram Inter-State border a duty tur Border Security Force (BSF) te Bilkhawthlir leh Kolasib-ah an in khuar mek a. COVID-19 lak a kan him tlan theih nan leh fimkhur zawka kan inven nan, 'The Mizoram Epidemic Diseases (COVID-19) Regulation 2020' Clause 11 (l) leh 'Disaster Management Act, 2005' in thuneihna a pek angin hetiang hian thupek a chhuah.

A hnuaia tarlan hmun te hi Containment Area ah puan a ni.

1. Diakkawn Middle School - I & RSTC Boys Hostel
 2. Bilkhawthlir Middle School - III
 3. Bilkhawthlir Primary School - IV
- ♦ Containment Area hian school compound a huam ang.
 - ♦ Containment Zone chungah mihring leh lirthei eng chi mah phalna neilo chuan kal phal a ni lo.
 - ♦ He Order hi ni 06.11.2020 atangin thu leh awm hma chu hman tur a ni.
 - ♦ He Order hian District Magistrate-in a hmun tlawh tura phalna a pek te a huam lovang.
 - ♦ He thupek zawm lo chu an chungah dan anga action lak a ni ang.



Kan then tak

Pi Niangzahawi (Kum 92), Khuangchera section, chuan ni 10 November, 2020 zan dar 10:10 khan chatuan ram min pansan a. Lumen pui niin, a tuk chawhma dar 10:00-ah vui a ni.

A kalsan tak a chhung leh khat, a laina zawng zawngte'n Pathian awmpuina leh thlamuanna an dawn kan duhsak tak zet a ni.

Sub-Hqrs YMA huaihawtin Kolasib Town Branch YMA-te'n Vairengtea naupang bo zawn hnatlang nei

Khuangpuilam the 15th November, 2020 : Sahmulphah thla tahrik ni 13, 2020 (Zirtawpni) chawhma dar 11:00-a SYMA OB Meeting No.21/2020 Resolution No.2 chuan Lalsiamthara (Kum 3 leh a chanve) s/o C. Zothanmawia Vairengte Hmarvêng, tahrik ni 11 Nov, 2020 (Nilaini) a bo chu hmuh a la nih loh avângin, zawnpui tura thawhchhuah a ÷ul thuta thawhchhuah dan tur sawiho tura a rel angin tahrik ni 13 Nov, 2020 (Zirtawpni) zan dar 7:00 khan SYMA Committee Room-ah Kolasib Town Branch YMA te nen Meeting neih a ni a. Branch YMA President leh Secretary theuh emaw OB remchang 2 kal khawmte'n Mibo zawng turin Vairengte khawtlang te puih ve ngei nise tiin thutlukna an siam a ni a. Hnatlan hun atan tahrik ni 14 Nov, 2020 (Inrinni) ruat a ni.

Naupang bo zawnna tur a ramchin hria kan nih lem loh avangin sum pai zawng a ÷anlak nise, a ÷ul thuta ram kal thei turin inbuatsaih nise tih a ni a. Nimin zing dar 10 khan Sub-Hqrs YMA OB hovin tukthuan ei kham khan Sub-Hqrs YMA Office kawt atanga chhuakin Vairengte an pan a ni.

Town Branch YMA-te mahni remchan ang zela sum thawhkhawm ni se tih a nih angin kan Branch hmingin ₹ 1,000/- pek ve a ni.

Mizoram Cleanliness Competition, 2020 Panel Experts te nen briefing nei

Sahmulphah thla tahrik ni 13, 2020 (Zirtawpni) khan Urban Development & Poverty Alleviation Department Director Pu H.Lianzela kaihhruiiin Mizoram Cleanliness Competition, 2020 a panel experts te nen briefing, Director's Meeting Room, UD&PA ah neih a ni.

Director leh Convener ni bawh Pu H.Lianzela chuan Deputy Chief Minister Pu Tawnluia hmalaknain October Ni 2 atangin Mizoram Khawpui Fai Intihsiakna bultan a ni thu a sawi a. Intihsiakna hi faina leh thianghlimna kawnga Zoram mipuite hmasawn tirtu ni se, intihsiak chung chauh nilo a nitin nuna faina ngai pawimawh turin UD&PA Department chuan mipuite a ngen a ni, tiin a sawi.

He briefing-ah hian Cleanliness Competition in Urban Town: Overview tih leh Competition Parameters and Assessment Procedure te PowerPoint Presentation a pek a ni a. Expert Panel te hian District hrang hranga khua 23 an tlawh ang a, zin chhuah hun (tentative) atan ni 23.11.2020 ruat a ni.

Parameters (tehma) atan Solid Waste Management, Information, Education & Communication, Community Participation, Public Feedback leh a dangte bakah, a hmasa ber atan Response to Covid-19 telh a ni.

Expert atana sawmte hi - Dr. Saithantluangi Zote, IPRO; Prof. Malsawmliana, Asst. Secretary, CYMA; Pi R.Lalrinfeli, Program Officer, MPCB; Pu Lalrinmawia, Secretary i/c Organisation, MJA te an ni.

He hun hi Joint Director (Admin) Pi Rita Lalnunmawii Pachauu chuan lawmthu sawiin a khar a ni.

I fate chet dan atangin i chet dan a lang thei a,
I khawsak phungin an mizia leh khawsak dan a hril thui hle.
Tawngkam mawi leh hawihhawm i hman tam a, mi chanchin chhia aiin an
thatna lam i sawi uar a, faina lamah ÷an i lak phawt chuan,
zirtir leh chuan ngai lovin i fate'n an rawn nunpui nghal ang.

YMA chu ÷anpui ngaite ÷anpuitu a ni. – YMA Kumpuan : Zirna uar

Editorial Board :

Represent: Pu Rotlingpuia
 Editor: Pu Ricky MS Dawngzela
 Jt. Editor : Pu Lalsiamkima
 Treasurer: Nl. Florence Zoremsangi
 Cir.Manager: Tv. Samuel Lalpekhlua
 Contact No: 9862501858 / 9612691291
 9612761781 / 7005494983

FLS Station - 9612566886

Chawngbawla Section

Leader : Pu F. Lalbiaksanga
 96121 55162
 Secretary : Tv. R. Lalnuntluanga
 82599 60032

Vanapa Section

Leader : Pu Lalchualova
 87300 99599
 Secretary : Tv. Lallawmzuala
 87875 41803

Khuangchera Section

Leader : Pu Lalramzaua
 76408 95924
 Secretary : Pu Zachungnunga Hrahse
 76299 69989

Editorial.....

US angin aw!!

US President inthlan vawi 46-na zet chuan huhang a ngahin an ramah an buai mup mup mai a ni lo, khawvel ram ropui bera chhal tih takah ram hrang hrangte'n an thlir thup a, keini India hmarchhak kil khawr takat pang paw'n kan veiin kan ngaihtuah em em a ni.

He inthlana lang Chiang ta em em chu, Pathian thu hmanga ram kaihhruaina duang ram ropui ah pawh hian Pathian hian lalna a chang nep tawh hle tih a hmuh theih. Inthlan zawh tawh hnu paw'n a chak zawk puan theih a la ni lo mai pawh a ni lo, a buai nuaih han hmuh te khuan a khaw party emaw zawk zawk khuan dawt hmangin tan an khawh tih a Chiang reng mai.

Sawi tur tam tak karah thil pahnih han thailang ila. Pakhatnaah chuan a ram mipuite khuan ram rorela an ngai thutakin an vei em em tih a lang reng mai. Tin, niutal (Neutral) an tih mai, party ruihchilh lo, party thil tumte ngun taka zira inthlanna nei thin te an pawimawhzia a lang nasa em em a ni. Sawrkar tura beisei bial nih ringawt an tum lo a ni tih a lang Chiang hle a ni.

He ram ropui inthlanna kan ngaihven em em hian kan ram inthlan -ah ngawng nei ve se a duhawm hle mai. Mi ram inthlang tur kan buaipui em em hian kan rama inthlanna pawimawhzia min hmuhtir se, chik taka zir chung a roreltu thlang thei turin min buatsaih ve se a tha hle mai. Roreltu thlan sualin paw i khawih nasat theih zia lah kan sakhaw buah chhiar tur a tam nasa mai si!!

Branch YMA Office Bearer

President	Secretary	Treasurer
Pu HD Daniala 9863212083	Pu Lalremsiama Varte 9862327112	Pu David Lalrosanga 9436158962
Vice President	Assistant Secretary	Financial Secretary
Pu S. Lalthangliana 8787326114	Nl. Florence Zoremsangi 9612761781	Pu Rotlingpuia 9862385193

No. CYMA 74/2020-2021/6 of 12.11.2020

Central Young Mizo Association

Mizoram : Aizawl

Central YMA Thuchhuak

Mizoram leh Assam ramri a Assam Sawrkar-in ramri pela Mizoram lama dan palzuta a chetna avanga buaina kal zelin a thlen, Lailapur-a kawng dan pin chu kar hnih dawn hnuah hawn tlang a ni leh ta. Kawng dan pin a nih chhunga Mizo mipuite dawhtheihna leh insumtheihna avangin Central YMA chuan lawmthu a sawi a ni. Tin, harsatna kan tawh mek lai hian kan unaute Mizoram pawn hmun hrang hrang a awm te'n kan harsat hlaua an inpeknate, tha leh zung, sum leh pai sengso a min thlamuannate hi a ropui kan tiin, Central YMA chuan lawmthu a sawi a ni.

Kawng dan pin a tlang theih nan a hmalatu Sawrkar, Kohhran, Political Party, Mizoram chhung leh pawna pawl hrang hrangte leh Sub-Hqrs/Group/Branch YMA-te chungah Central YMA chuan lawmthu a sawi tak meuh meuh a ni.

Kawng hawn a nih tak avanga nitin mamawh bungrua lo lutte a daih zai thei ang ber a mipuite'n kan chan tlan theih nan, mamawh bak aia tam chhekkhaw lo turin Central YMA chuan Mizo mipuite a ngen a ni.

Kawng hawn tak hi harsatna awmzui tawh lo turin kan beisei a, harsatna lo thleng leh thei a nih avangin, Central YMA thu ngaichang a hmala nghal thei mai turin Sub-Hqrs/Group/Branch YMA-te kan inngen a ni.

YMA vul zel rawh se.

Prof. Lalnuntluanga
 General Secretary

Khuangchera section ten Sumtuak hnatlang nei

Khuangchera Section YMA te chuan ar sa satin sumtuak hnatlang an nei a. Zirtawpni zan khan satin a tuk inrinni khan sa hauhtute hnenah an sem kual leh a ni. (Hri leng karah Section hmalak tak tak theih a nih loh rualin kan hmalakna awm te Daifim chanchinbu atan thehluh thin nise a lawmawm hle ang.)

CYMA hmalakna

6.11.2020 : SAD Conference Hall-ah 'Review Meeting of the on-going Lockdown' neih a nia; Pu Vanlalruata, President, a tel.

7.11.2020 : Tripura nena inkal-pawhna kawng leh Lei chei that mekte a hmuna enpuiin Central YMA aiawhin Prof. Lalnuntluanga, General Secretary leh CEC member-te Tv. Zochhuana, Pu C. Vanlalruata leh Er. Lallawmzuala Pautu te an kal.

12.11.2020 : Minister, Agriculture Deptt. Pisa-ah thil man chungchang sawihona meeting neih a ni a; Prof. Malsawmliana, Asst. Secretary, a tel.

13.11.2020 : Saroj Kumar, Major Adjutant, 46 Assam Rifles-in an Battallion Headquarters-ah NGO's Conclave a buatsaih a, CYMA OB-te tel tura a sawm angin OB-te an tel.

Quarantine dinhmun

Kolasib District chhunga Quarantine-na hmuna awm dinhmun (Ni 14.11.2020, 06:00PM)

- Ni 14.11.2020-ah Quarantine Facility-ah lut mi 13 an awm a (Lodge - 4, Polytechnic- 9), mi 12 chhuak an awm thung (Lodge - 6, Polytechnic - 6).
- Lailapur Garrison CIJWS atangin mi 22 an chhuak a, mi 8 an lut thung. Pratap Hall, CIJWS atangin chhuak an awmlo a, mi 72 an lut thung.
- Tun dinhmunah District chhunga Quarantine Facility hrang hrangah mi 203 an awm mek a, Quarantine Facility pangngaiah mi 46 leh CIJWS Quarantine Facilities ah mi 157 an awm mek a ni.
- SIRD CCC-ah lut leh chhuak an awmlo. Tun dinhmunah mi 5 SIRD CCC-ah an awm mek a ni.
- DCHC-ah enkawl lai tumah an awm hrih lo.

Min tihlimtu leh min vengtu turin ran kan vulh thin; mahse, kan himna leh himna hian midang tibuaiin tithlabar thin suh se. Ran te hian nun an tinuamin kan tan an tangkaiin an pawimawh; mahse, i mihringpuite an pawimawh zawk tih hre reng ang che.

Mita kan hmuh leh beng a kan hriatte hi hmasawna kawng zawh nana hman tur a ni.

Thenawm state Assam-in Sept, 2020 atanga kan ram chin dik tak min rawn chuhpui avanga harsatna kan tawh mek chungchangah leh USA President 46-na tur Nov 3, 2020-a thlan chungchangah Zoram Sorkar leh Zoram mipuite'n bung thar kâi ta hluai ni âwm taka sawi a awm avangin, bung thar kan kâi chiah em tih i han thlirho teh ang.

RAM HRUAITU THAAH : Khawvel lehlam USA President 46-na tur thlan chungchang kan lo buaipui ve hle a; Social media hrang hrangah Dr. PC Biaksiama leh nula Mimi-te kan chotuah titih deuh lehngal emaw ni? A lawmawm e, ram hruaitu tha leh rintlak hi kan mamawh tlâng rêng a ni. Hetih lai hian khawvel ram hausa ber leh ropui bera kan ngaih ni mah se, USA inthlanna 2020 chu a buai ta nuai nuai mai niin a lang a, vote lem (voting fraud) a awm ngei nia hriat a ni a, Dec. 8, 2020 hma chuan thumum fumfe a awm hlei thei dawn lo a nih hmel hle. USA inthlan chungchangah Israel rama zohnahthlak unaute (Bnei Menashe-Mizo, etc) ka biaknaa an sawi fiamthu dan chuan USA hian vote a tihchingpen ve ngai loh avangin 2020 inthlanah an han ti ve chhin a, an zeil lutuka vote tihchingpenah chuan India an tluk lo niin an sawi a; thil ni thei ve tak tur niin a lang. A chhan chu Mizoram State Assembly General Election kum2009 leh 2014-ahte khan EVM tihchingpen awm ngeia hriatna leh 2014 kum veka Lok Sabha inthlanpui neih tuma BJP an chak thut tum khan vote rigging awma puhin lawsuit hial theh luh niin a lang. Mahse, hetiang hi a lo awm ngei a nih pawhin Court meuh pawhina a hmuh chhuah theih loh khawpin trick an hai thiam a ni mahna! USA erawh a takin a mualpho mek a nih hmel hle. USA inthlan kan lo buaipui ve êm êmna chhan nia lang chu: (a). ram hruaitu tha leh mi dik, rintlak kan duhpui vang,; (b). Pathian & Setana indona ang hiala ngaihna a awm vang; (c). Khawvel puma Kristiante hma khua ngaihna vang; (d). India rampum hmakhua ngaihna vang leh China dolet duhna vang; (e). Khawvel pumah leh a bikin Mizoramah LGBT, or GLBT an huangtau phah hlauhna vang etc.

US inthlanpui kan lo buaipui ve viau nachhante khi a ropui hle. Mahse, kum 2023-ah State Assembly inthlanpui kan han nei leh mah na'ng a; chutih hunah chuan mi ram tana hruaitu tha duhpui hle sia insual hial cho ut ut nia langhote leh Zoram mipuite hian kum 2023-a inthlanpui kan hmachhawn leh turah hian ram hruaitu tha leh mi dik, rinawm, ram hmangaihtu, ramri vengjim ngam kan duh tak tak ang em? tih chu a la lang Chiang dawn chauh a; mahmi party ringawt kan thlir leh tho a nih erawh chuan USA inthlanpui atanga bung thar kai ta anga kan lan mekna hi dawtah kan chantir tihna a ang. Political party tinah hian mi tha tak tak an inphum a, hruaitu tlak lo, mi pamham leh depde tak tak pawh an inphum feuh a, chutih hunah chuan ram hruaitu tha leh rintlak, ram hmangaihtu; ramri humhalh ngam Donald Trump anga huaisen thlan chhuah chu kei leh nanga mawhphurhna a ni tawh ang. Mi ram hruaitu tur heti taka duh ulukpui si hian 'Aw Lalpa, a ngai bawk" kan tileh si a nih vaih chuan bungthar kan awzawng kan kâi lo tihna a ni ang.

TANRUALNAAH: Pu Lalfakzuala, IAS Mizoram CS (Rtd)-in a sawi thin angin Assam nena kan ramri buai hi kum 170 (1850-2020) zet a ni ta. Mahse, tun thlengin chinfel a la ni chuang lo. Krista lo lanleh thleng a la awh dawn pawh chu a ni mahna le! Chutih lai karah Sapho min awp laia Notification No. 2299P of 20th Aug. 1875 tan chhanin kan state ramri dik tak kan hauh na hle a. A lehlamah Assam lam hian fin rawl chhuahin state pahnihte remtih tawna awm hauh lovin an duh ang angin Notification No. 2299P of 20th Aug. 1875 chu paih bo (repealed) tawh ang hrima chei bawlin Notification No. 2106A.P of 9.3.1933 etc-te Central sorkarah chhuahtirin chu chu an tan chhana kan innawr ngat ngat ta thin niin a lang. Hetih lai karah June 30, 1986-a India leh MNF inremna thuthlung (Peace Accord) Legal Administrative and Other Steps" No. 1-ah khan "The territory of Mizoram shall consist of the territory specified in Section 6 of "the North Eastern Areas (Reorganization) Act, 1971" tih chu ihe lovin hming an lo ziah hnan kha a ni a; hei hian Assam lam tanhmun a sawh ngheh phah sauh tih chu hai rual a ni lo. Kha inremna thuthlung kha Sorkar laipui, MNF President leh Mizoram State Sorkar aiawhin Chief Secretary-te remtih tlan vek a ni a; inchhir a sawt tawh si lo. Hei tho hi Mizoram Union territory kan nih tirh January 21, 1972 lai khan barhluih ramri pek kan ni tawh a. Mizoramin"State puitling kan hmuh February 20, 1987 khan kan pawmleh thlap bawk si nen. Assam lam hian huai takin min rawn nawr tawm ta tawn tawn a. Mahse, Mizoram Sorkar kal tawhte khan an dang ngam meuh lo nge kan ram chan a zim ta tial tial a ni ber.

Kum 2019 June thla khan Lailapur Forest Beat Office an rawn chei that avangin kan buai a. CM zahawm tak Pu Zoramthanga chuan kan ram chhung ngei Vairengte daia awm thin Police check gate atanga 505 metres-a hlaa awm Pioneer Camp hluiah IR a dah ta a, he lai hmun hi tu lam ve ve mahin cheibawl phal lohna hmun a ni a, mahse huaisen takin Chief Minister hian IR a dah a, tun thlengin an la awm a nih hmel. Tin, Chief Minister remtihnain Pioneer Camp atanga 450 metres vela hla Vairengte Auto Stand ah IR duty post sak a nileh ta a ni. Chemtâtrawta thawnthu ang mai khan kan politician-te leh ministry kal tawhte kha ramri humhalh tha lovah tun thlengin an mawhchhiat tawn vek a nih hmel. Inthlan dawn apiangin an chawh nung thar thin a; chutiang bawkin Assam politician-hote pawh an ni tho bawk. A pawl ber chu Lushai Hills, Mizo District, UT, Peace Accord leh State kan nih thlenga ministry chelhtute khan kum 170 chhung zawng khan engatinge Notification No. 2299P of 20th Aug. 1875 hi an humhim theih loh tih hi a kawlpui ber chu niin a lang. Engpawhnise, ramri humhalh kawngah Zoram mipui kan harh thar lehzuah a; Vairengte, Saiapui -V, Phainuam khawtlang, thinghlun, Mamit, Kanhmun, Zophai (Bairabi) leh ramri hrula mipui awmte bakah political party hrang hrang, YMA, NGOs, Zirlai, nu leh pa, mimal tinte bakah state pawn leh ramdanga zohnahthlak zawng zawngte kan tangrual tha hle a, hetah hi chuan bungthar kan kâi takzet ta niin a lang. He kan tanrualna hi tawpsan mai lovin chhunzawm zel ila hmatiang sawnin raltiang ram kan kâi ngei ang.

(☞ Phek 4-na)

Kan lei hian ruh a neilo, thinlung erawh a chhuntlang thei, i thusawi fimkhur rawh.

INTODELHNAAH:- Kan Ramri diktak kan humhalhna avanga Assam lamin ni 10 chuang zet kawng an danpin azarah Sorkar leh Zoram mipui kan țangrual a; hripui avanga inkhârkip leh kawng danpin lang lêk lo khawpin kuthnathawktuten țan an la a, lo/leilet neih leh huan lo ram, chuktuah huan siam lamah hma an la nasa hle a; a lawmawm takzet a ni. Hei aia nasa hian Sorkar hian hma lain chawhmeh thlai ilo chauha intodelh tum lovin, buh leh balah intodelh tumin leilet tur phâi zâwl awm thei zawng zawng dapin tlangram leilet (hill terrace) siam tel țeuh baw se, FCI drip khai ngai renga awm tawh lo turin hma la ila, Kanan khawizu leh hnute tuia luang ram kan chen thei ngei ang. Tin, mau chihrang 30 chuang kan neihte hi vaiho kuta dah lovin power hnianghnar tura tan la tharin paper mill dinin hmang tangkai baw ila, Industry leh kawng hrang hrangah tan la chhunzawm char char se bungthar kan kai lehzual ang.

INKALPAWHNAAH:- Technology changkang tawhah hian tele Communication lamah chuan kan buai vak lo, mahse, road communication lamah hian bungthar kan kai hlei thei lo hi Mizoram khawvel tana thil paw ber a tling hial awm e. January 21, 1972 UT kan nih ațanga chhutin kum 48 zet a liam mek. Ngatinge khatih hun chhung zawng khan ministry hrang hrang kal tawhte khan Silchar (Assam) kal pawhna chauh an ngaihtuaha a dang zawng an hlam chhiah le? UT Sorkar phei kha chu Central Sorkarin 100% funding a pe zar zar a, a thlâwna Central drip full dosage-a kan khai theih lai khan Manipir, tripura etc.pawhna kawngpui tha National Highway, Industry, power plan project etc. lianpui pui kalpuiin an sial kuak chuk loh le? Silchar kawngpui dan a nih apianga dangro dang châra kan tãmchhâwl țhin leh Sakhi luite tui châka thaw huam huam ang maia kan vir chung țhin hi a zahthlak takzet a ni. Tun tumah pawh hian kan sorkar hian Tripura leh Manipur chawpleh chilha pawh tumin kawng a dap ngial a, kan hlawhtling hlei thei rih lo a ni ber a niang? Silchar ațanga lirthei lo lut chu hahipin kan theh darh chuai chuai a; a sukawtu nih kan inchuh lek lekte'n kan lang leh nghal a, zah nachang kan hria a hun hle lo maw? Sorkar pawhin Assam ni lo, Manipur leh Tripura bakah Bangladesh leh Myanma lam hawia kawngpui țha nei tura hma a lak mekna hi Silchar kawngpui a tlang tāk avanga an tawpsan emaw, tha an thlah leh a nih vaih chuan kan dinhmun ngaiah baw hrêk riltâmin kan awmleh ngei ang. Chuvangin, kawngpui sial lamah hian a taka hlawhtling ngei turin bungthar kai tak tak tawh ila a lawmawm ngawt ang. Kum 170 zet ramri chinfel loha awm hi chinfel thar thut theihna a awm dawn chuang lo. Chuvangin, tha kan thlahleh a nih vaih chuan hun reiloteah kan mangang leh anga, kan riltam chiau thawm ngai ang bawkin Arunachal Pradesh ramngaw vangvat lian angin kan chik leh nghur nghur dawn a ni tih kan Sorkar hian hre reng se a lawmawm ngawt ang.

A tâwp berah chuan bungthar kan kâi theih miah lohna la awm chu ei leh bara harsatna kan tawh apianga chawhmeh thlai ilo leh nitin mamawh (essential commodities) zuartute'n an duh tâwk tâwka an chênpuî leh hnampui, ringtupui Mizo mipuite min ei ral thak duh khawpa an thil zawrh MRP leh MRP nei lo chi pawh an chhiar țhin hi a ni. Pathian hian- "Sum lam in ngah tâwk bawka Vanram in lo lut ve duh a nih chuan chhungkaw member pakhat zelah US \$ 10 Billion zel entry fee in châwi a ngai" ti ve ta khauh mai

se, an rilru chu a hah ve viau ang le! Mahse, chhandamna hlu tak chawhmeh leh thlai ilo, essential commodity aia hlu zawk chu mitin tan a thlawna pek kan ni a, mahse, an thil chin țha lo tak hian chhandamnaa an luhna kawng a dâl tlat si ale! Mihausa vanram kai tum meidila tla ang kha an la ni ngei dawn si a. Tun ațang hian sim vat se, Commerce & Industries lamte pawh hian khauh takin thunun se bungthar kan kaileh thei mai thei. Ngawi renga an enliam mai mai zel a nih chuan a zual zawpui vailenhlo tih mai loh chu hmabak kan nei chuang lovang.

Chuvangin, tuna hripui lêng leh ramri avanga harsatna kan tawh mekte hi US President kan duh ulukpui aia uluk zawk hian hripui lakah uluk zawkin inveng fimkhur theuh ila, kan verthernate dah bovin kan nun uluk taka vawngin, a phaw vuaka ram hmangaih mai lovin a tak taka ram hmangaihin thil tih nen bawhzui zel ila, inpumkhatna țha lehzual nei turin hmatiang i sâwn zel ang u.

Tata Group-in Minute 90-a hripui kai hriat theihna test kit an tlangzarh

Tata Group health care unit atan Medical and Diagnostics chuan 9/11/2020 khan Covid-19 test kit thar an tlangzarh a, he an test kit tlangzarh thar hi December thla hi chuan laboratory leh damdawi-in hrang hrangah a hman theih tawh dawn tih CEO Girish Krishnamurthy chuan Reuters a hirih.

Hemi ni a Tata Group-in test kit thar an tlangzarh hi sorkar pawhin a pawmpui thlap tawh a, hemi hmang hian minute 90 chhungin test result a hriat theih nia tarlangin Chennai-a Tata plant-ah test kit hi an siam țhin dawn a; thla khatah maktaduai khat an siam hman dawn a ni, tiin Krishnamurthy chuan a sawi.

India ramah hian Covid-19 kai hi pung zel mah se a tlahniam ve sawt tawh hle a, 9/11/2020 thleng khan mi 85,53,657-in an kai tawh laiin 79,17,373 chuan an dampui leh tawh a, 1,26,611 laiin an thihpui tawh thung.

Covid-19 hri kai enkawl dam tawh rate hi 92.56% a ni tawh a, nitina positivity rate chu 5.5% a ni.

Ayurvedic Covid-19 drug siam phalsak

AYUSH Ministry chuan Dalmia Healthcare Limited hnenah Ayurvedic Covid-19 drug, Astha-15 siam a phalsak.

Dalmia Healthcare hian a hmain an damdawi siam hi Covid-19 kaite enkawl na atana clinical trial neih phalna a lo dil tawh a ni. Enchinna an neihah hian Ashta-15 hian khuh a tihziaawm bakah, respiratory rate a tichak a, hei hi Covid-19 kaite an dam chak theihna turin a pui hle tih hriat a lo ni tawh tih Dalmia Group of Companies chairman, Sanjay Dalmia chuan a sawi.

Astha-15 hi a thawh khatnaah chuan doctor prescription hmangin Covid Hospital-a hri kai enkawl mekte tana hman a ni ang. Dalmia Healthcare chuan allopathic hospital-ah pawh hman a nih theihna atan phalna a la dil leh dawn a ni.